



Un. prof. TADIĆ (Ivana) FABIJAN, dipl.inž.geod.

Dana 23. novembra 1993.godine iznenada je preminuo naš kolega i prijatelj Fabijan (Ivana) Tadić u 83. godini života, profesor Građevinskog fakulteta u penziji. Sahranjen je na nekom groblju na Grbavici jer je tamo stanovao, nažalost bez dužnog ispraćaja koje je zaslužio. Čuli smo da je umro prirodnom smrću u prisustvu svoje supruge a možda i jednog unučeta. Njegov sin Zvonko, dipl.inž.arh. živi i radi desetak godina u Sidneju u Australiji sa suprugom i dvoje djece. Tamo je otišla i kćerka Mirela sa jednim ili možda oboje djece. Najstarija mu kćerka živi vjerovatno negdje u Bosni i Hercegovini ali o tome ne znamo pouzdano ništa.

Fabijan Tadić je rođen 12. aprila 1913.godine u Živinicama kod Tuzle, gdje je završio osnovnu školu 1924.godine. 6 razreda gimnazije završio je u Tuzli. Prvi razred Geometarskog odsjeka učio je u Sarajevu, a drugi, završni razred u Beogradu gdje je i diplomirao, 1932.god.

Odmah po diplomiranju zaposlio se privremeno u Opštini grada Beograda, a 1933. prelazi u Odjelenje za katastar Ministarstva finansija u kome je radio, uz prekid radi odsluženja vojnog roka (1934-35). Na novom premjeru u Srbiji u terenskim sekcijama Žagubica, Čuprija, Svilajnac, Kruševac i Bela Palanka, odakle po završetku kratkotrajnog rata 1941.godine prelazi u Bosnu, i ubrzo se zapošljava u Katastarskom uredu u Tuzli kraće vrijeme, jer je bio mobilisan u vojsku gdje je ostao sve do završetka rata 1945.godine.

Septembra mjeseca 1945.godine zaposlio se u Uredu za kolonizaciju u Brčkom a zatim od marta do oktobra 1946. prelazi na rad u Katastarski ured u Kladanj a iza toga prelazi u Geodetsku upravu u Sarajevu. Radio je do januara 1947. na premjeru grada Mostara a potom prelazi u preduzeće "Georad" u Sarajevu u kome radi do oktobra 1947, kada daje ostavku i odlazi u Zagreb radi dovršenja studija na Geodetskom fakultetu na kojem je još 1947. bio upisan kao vanredni student.

Fakultet je završio sa vrlo dobrim uspjehom a diplomski ispit je položio sa odličnim uspjehom koncem decembra 1952.godine. Za te tri godine izdržavao se od povremenog rada u Zagrebu.

Po završetku studija odmah je došao u Sarajevo pa smo ga ponudili da se kao asistent zaposli na našem, tada Tehničkom fakultetu. Na naša dva odsjeka, predavala se Geodezija, na

Građevinskom kroz dva a na Arhitektonskom kroz jedan semestar. Odmah je bio izabran i nastupio na posao.

U zvanju asistenta ostao je do jula 1961. a nakon prijavljene i uspješno odbranjene habilitacije izabran je u zvanje docenta.

Godine 1966. raspisan je konkurs za nastavnika na predmetu Inženjerska geodezija na Prvom stupnju nastave (dvogodišnji studij) koji je u međuvremenu organizovan za građevinske inženjere. Tadić se tada prijavio za zvanje vanrednog profesora. On je do tada napisao i objavio desetak zapaženih radova visokostručnog i nastavno naučnog karaktera, na osnovu čega je i bio izabran za vanrednog profesora.

Građevinski fakultet je 1973. godine osnovao Geodetski odsjek pa su se pojavile potrebe za osnivanje novih kabineta i biranje novih nastavnika. Tako su i nastavnici preuzeli nove predmete, a Tadić je prihvatio Geodeziju i Geodetske planove za geodete.

Fabijan Tadić penzionisan je u zvanju vanrednog profesora 1982. godine.

U društvenom životu svima nam je poznato, da je bio svugdje angažovan, negdje manje negdje više: u Udruženju geodeta, na upravnim funkcijama, u organima upravljanja i td. Svi su ga radni ljudi na Fakultetu cijenili kao ozbiljnog čovjeka koji je sve dužnosti obavljao na primjeran način.

On je izvodio nastavu i na mnogim drugim školama, u Srednjoj i Višoj geodetskoj školi, na Šumarskom fakultetu i td.

Mi, njegovi kolege i prijatelji, njegovi bivši učenici i studenti, dugo ćemo se sjećati i pominjati dragog nam Fabijana Tadića sa velikim poštovanjem.

Neka mu je slava i veliko hvala.

*Ismet Aganović*